

# Matrimonio Fingí

Poko aña pasá damanan stranhero a kasa ku kualke hòmbler antiano simpelmente pa haña un pasport hulandes. No a importá nan si e hòmbler ta di edat atvansá, bon di kabes, òf deskonosí. Nos a yama esaki “matrimonio fiktísio.”

Ma tin un otro fenómeno muchu mas komun na nos islanan: “matrimonio fingí.” E palabranan ei no ta usá, ma hopi bes esei ta presis loke hende bibá ta praktiká. E pareha ta hunga un komedia mentiroso, pretendiendo ku nan ta kasá.

E hòmbler kisas ta yama e muhé su “señora”. Ambos ta papia di “mi kasá” òf “mi suegronan.” Talbes nan ke konvensé hende ku nan ta kasá. Ma e ta solamente un “matrimonio fingí!”

Kohabitashon por ta un mentira devastadó. Den hopi kaso, fo’i tempu nan a drenta ku otro, un di e partnernan (mayoria bes, e dama) a deseá di kasa. E yònkuman a primintí ku un dia si e lo kasa ku n’è ma a insistí ku e no ta “kla” ainda. E yùfrou a bai siegamente su tras, antisipando dia ku e hòmbler lo “keda kla.”

Nos tur konosé parehanan asina. Tres yu i dies aña despues, ainda e mener no ta “kla.” E tin e dama na liña ketu bai. E dama frustrá tin poko opshon: biba su so ku su yunan (ku poko rekursu finansiero) òf sigui karga speransa ku un dia e meneer su mentiranan lo kaba i e porfin lo keda “kla”! E hòmbler solamente ta fingi interes pa matrimonio.

Tin un otro mentira destruktivo di konkubinato ku hopi pareha bibá mes ta ker’è. Nan ta tuma “bibamentu” komo un matrimonio di prueba. E dama ta laba tayó, bari, mòp, kuida e yunan, èts...**méskos** ku un señora kasá. E hòmbler ta trese sèn kas, hunga ku e yunan, èts...**méskos** ku un esposo. Nan tin kompañerismo, amor, sèks, sèn, èts...**méskos** ku un pareha kasá. Nan KE SA ku nan ta eksperensiá bida matrimonial. “Ta méskos ku nos ta kasá,” nan ta insistí. “Nos amor ta asina fuerte ku nos no tin mester di un papel. I nos por averiguá si nos ta pa otro promé ku nos mara e laso matrimonial. Si kos bai bon, nos por kasa. Ma si bida huntu ta laga di deseá, sikiera nos a evitá un divorsio doloroso!”

Esei ta bida matrimonial? Apsolutamente nò! **Matrimonio no ta eksistí sin dedikashon total, BIDA LARGU.** Dedikashon bida largu ta un ingrediente ESENSIAL di matrimonio. Beibel ta bisa. “*Un esposa ta mará na su esposo tanten ku su esposo ta na biba; ma si su esposo muri, e ta liber pa kasa ku ken ku e ta deseá...*” (1 Korintionan 7:39; Romanonan 7:2). Bibamentu por tin hopi ingrediente di matrimonio, ma e ta falta esun **esensial**. Sin dedikashon **bida largu**, e pareha no sa kiko ta kome i bebe di bida matrimonial. Loke nan ta eksperensiá NO ta matrimonio!

Den último añanan, vários estudio ta demonstrá kla ku kohabitashon ta falta dedikashon bida largu i asta ta yuda destruí esaki. Segun un estudio di 1985, solamente 25 porshento di hende muhé i 20 porshento di hende hòmbler a kasa ku e persona ku ken nan a biba. Pues, si bo ta bibá, tin 75 te 80 porshento chèns ku bo lo NO kasa ku bo partner!

Segun un enkuesta na Merka, parehanan ku a biba huntu promé ku nan a kasa tin 33 porshento MAS chèns pa separá òf divorsiá dentro di dies aña kasá. Sífranan na Suesia, unda bibamentu ta mas respetá ku Merka, ta mas alarmante. Ei muhénan bibá tin 80 porshento MAS rísiko di divorsiá despues di kasa. **Kohabitashon ta yuda DESTRUI matrimonio!**

Hende ku ta kere ku bibamentu ta MESKOS ku matrimonio ta mal informá, mal bruhá, òf mal gañá! **Realidat ta: òf bo ta kasá, òf bo NO ta kasá! No tin otro alternativa.** Ta asina simpel! Matrimonio ta demandá dedikashon **total, bida largu.**

E pareha bibá por hunga e komedia bon. Nan por gaña tur hende ku nan ta kasá. Asta nan por gaña nan mes. Ma echu ta ku nan relashon ta nada mas ku “matrimonio fingí!”